

Da la noblezza e lur chastels en il Grischun

«Terra Grischuna»: Abitadis da famiglias aristocratas e da pussanza

■ (anr/gc) Chastels n'èn betg sulet simbols da pussanza passada, ma bain marcan era la cuntrada. Radund 300 ruinas da chastels, insaquants intacts e numerusas chasas da patri-zians, èn perditgas vesaihlas dal temp feudal. Da tals chastels e da schlattainas e dinastias da noblezza e pussanza en noss chantun relata la novissima ediziun da la «Terra Grischuna» (5/2013).

D'insaquants chastels, lur abitants, funcziun e muntada

Descrit vegn co igl è vegnì tar la noblezza grischuna. Era schè las Trais Lias eran in stadi democratic ha i dà qua ina classa dirigenta che sa considerava sco nobla ed aristocrata. En il decurs dal 18. tschientaner han ils da noblezza eregì lur edifizis profans en grond dumber, surtut en il Grischun dal nord. Tranter quels s'audan er il chastè da Gaudenz de Capol a Flem e dal marschal Rudolf von Salis a Zezras.

En l'imposanta tur dal chastè da Rietberg en Tumleatga abitescha cuss. naz. *Andrea Hämmerle* cun sia famiglia. Ertà ha el quel da sia mumma ord la famiglia da Rudolf Planta-Casparis. L'antierur magistrat sa senta fitg bain. Ins saja dentant er obligà da mantegnair l'edifizi.


Sut il titel «Salis versus Planta» vegn rendì attent a la ostilitad istorica tranter quellas duas impurtantas famiglias en il Grischun. Ellas èn vegnidas en il 15. e 16. tschientaner a lur pussanza. Igl è vegnì tar bleras e lungas rivalitads

politicas tranter la partida dals Salis e quella dals Planta che sustegnevan mintgamai er autras pussanzas europeas. Mo malgrà quai ha i adina era dà maridaglias tranter Salis e Plantas.

Zunt represchentativ è il chastè dad Ortenstein en Tumleatga. Quel è stà pli che 300 onns e durant 17 generaziuns en possess da la famiglia de Travers che derivava oriundamain da l'Engiadina. Giachen, in figl dal reformatur Gian de Travers, ha fundà la lingia dals Travers d'Ortenstein per sa differenziar da quella da l'Engiadina. Da quella famiglia èn sortids capavels politichers, clerichers e surtut uffiziers. Quai ha durà fin il 19. tschientaner. Alura han ils figls da Gion Victor de Travers s'falarà l'entira facultad e terminà la dinastia. 1860 era il chastè vid. Curt avant vuleva pader Teodosi Florentini endrizzar là ina chasa per uffants negligids. Mo ordlonder è vegnì nagut. La finala ha Wolfgang von Juvalta Ortenstein cumprà e spendrà il chastè che sa chatta anc oz en possess da quella famiglia.

Vi da mez dal 18. tschientaner ha i dà per curt temp seminaris en il spiert da l'illuminessem en il Grischun. Scolars da geniturs bainstants frequentavan quellas scolas en ils chastels da Haldenstein, Marschlins (scola da la naziun) e La Punt/Reichenau. Quels instituts han gì ina gronda influenza sin la pedagogia en noss chantun.

Cun raschun han ins er allegà Karl August Lingner (1861–1916), il ritg fabricant tudestg d'Odol che ha cum-



prà 1900 il chastè da Tarasp per 20 000 francs. El l'ha laschà renovar, è dentant mort avon che la restauraziun era finida.

Tractà anc plirs temas

Ultra dal cuntegn principal pertugant la noblezza en il Grischun è cuntegnida en las spartas «Magazin e Gasetta» ina gronda retscha da contribuziuns zunt interessantas. Da quellas sajan menziunadas be: «Dals capuns als gnocchi» – in'excursiun sin la via dal Lucmagn da Mustér ad Olivone (Luorscha) e l'inscunter cun Oscar Bernhard, in medi alpin en Engiadina auta. Quel, era numnà «doctor sal sulegl», ha gronds meritis per il salvament en muntogna, è stà il fundatur da la helioterapia (medegiar cun la glisch dal sulegl) ed è oz tant sco emblidà dal tut.